



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 695, Datë 15.05.2020

“Mbi autorizimin e përqendrimit të realizuar nëpërmjet krijimit të një ndërmarrje të përbashkët me funksione të plota Joint-Venture nga shoqëritë Saudi Aramco Development Company dhe Ge Oil & Gas Uk Limited (Baker Hughes)”

Komisioni i Konkurrencës me pjesëmarrjen e:

Znj.	Juliana LATIFI	Kryetar
Z.	Eduard YPI	Zv/Kryetar
Znj.	Leida MATJA	Anëtar
Znj.	Adriana BERBERI	Anëtar
Z.	Helidon BUSHATI	Anëtar

Në mbledhjen e tij të datës 15.05.2020, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një ndërmarrje të përbashkët me funksione të plota Joint-Venture nga shoqëritë Saudi Aramco Development Company (SADCO) dhe Ge Oil & Gas Uk Limited (Baker Hughes).

Baza Ligjore: Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, dhe nenet 53-64. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit”, dhe formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet krijimit të një ndërmarrje të përbashkët me funksione të plota Joint-Venture nga shoqëritë Saudi Aramco Development Company (SADCO) dhe Ge Oil & Gas Uk Limited (Baker Hughes)

VËREN SE :

Transaksioni dhe përqendrimi

Pranë Autoritetit të Konkurrencës, është depozituar njoftimi lidhur me krijimin e një ndërmarrje të përbashkët me funksione të plota Joint-Venture nga shoqëritë Saudi Aramco Development Company (SADCO) dhe Ge Oil & Gas Uk Limited (Baker Hughes).

Saudi Aramco Development Company (SADCO) është një shoqëri me përgjegjësi të kufizuar, në pronësi të plotë të Mbretërisë së Arabisë Saudite. SADCO është një filial i zotëruar plotësisht nga shoqëria Saudi Arabian Oil Company “Saudi Aramco”, e cila merret kryesisht me prodhimin dhe tregtimin e naftës, gazit, shërbimeve dhe fushave prodhuese. Në një masë pak më të kufizuar ajo merret gjithashtu edhe me prodhimin dhe tregtimin e produkteve të rafinuara dhe petrokimike.

Baker Hughes Company është një shoqëri aksionare e themeluar në vitin 2016, e ndryshuar më datë 03.07.2017 pasi u bashkua me Ge Oil & Gas për tu bërë Baker Hughes, një shoqëri GE (General Electric Company). Ge Oil & Gas zotëron 38.4 % të aksioneve në Baker Hughes Company. Baker Hughes Company është shoqëria mëmë e grupit të shoqërive Baker Hughes, e cila është një ofruese shërbimesh dhe produktesh të integruara të fushave naftëmbajtëse. Gjithashtu ajo merret me zgjidhjet dixhitale që rrisin produktivitetin, minimizojnë riskun dhe ulin kostot. Kompania siguron industrinë e naftës dhe gazit me produkte dhe shërbime për shpimin e naftës, vlerësimin e formimit, përfundimin, prodhimin dhe konsultimin e rezervuarit.

Grupi Baker Hughes ka një degë të regjistruar në Shqipëri, përkatësisht Western Atlas International LLC. Fusha e veprimtarisë së Western Atlas International LLC në Shqipëri është eksplorim, nxjerrje, zhvillim, prodhim, transportim dhe marketim hidrokarburesh dhe nënprodukte të tyre.

Joint Venture do të jetë një shoqëri e përbashkët mbi produktet jo-metalike, e krijuar sipas legjislacionit të Mbretërisë së Arabisë Saudite, e cila do të operojë në Lindjen e Mesme dhe Afrikën e Veriut. Kjo shoqëri do të ndërtojë dhe operojë objekte prodhuese të prodhimeve jo-metalike/kompozite për përdorim në aplikimet për naftë dhe gaz dhe industritë e tjera. Produktet që do të operojë dhe shesë kjo shoqëri do të jenë tubacione termoplastike të përforcuar dhe linja rrjedhëse për përdorimet në naftë dhe gaz. Gjithashtu kjo shoqëri do të marrë në konsideratë investime të reja, fusha të blerjes, investime kapitale dhe investime për hulumtime dhe zhvillim në mundësinë e biznesit në lidhje me aplikimet jo-metalike brenda dhe jashtë sektorit të naftës dhe gazit.

Vlerësimi i përqendrimit

Më datë 20 Shkurt 2020 është nënshkruar “Marrëveshja e Aksionarëve” ndërmjet shoqërive Saudi Aramco Development Company (SADCO) nga njëra anë dhe Ge Oil & Gas Uk Limited (Baker Hughes) nga ana tjetër, të cilat kanë rënë dakord që të krijojnë një ndërmarrje të përbashkët joint-venture me funksione të plota.

Shoqëria e përbashkët J-V do të zotërohet 50% nga shoqëria Saudi Aramco Development Company dhe 50% nga shoqëria Ge Oil & Gas Uk Limited (Baker Hughes).

Palët synojnë që së bashku të krijojnë dhe operojnë një shoqëri e cila do të vijojë hulumtimin dhe zhvillimin në aplikacione jo-metalike të naftës dhe gazit. Gjithashtu do të sigurohet një mbështetje dhe zhvillim dhe aftësi inxhinierie në lidhje me produktet për përdorim në aplikimet në naftë dhe gazit.

Transaksioni i propozuar konsiston në përqendrimin e realizuar nëpërmjet krijimit të një shoqërie të përbashkët joint-venture me funksione të plota nga Saudi Aramco Development Company

(SADCO) dhe Ge Oil & Gas Uk Limited (Baker Hughes) duke plotësuar kriteret e nenit 10 të Ligjit 9121/2003 ‘Për mbrojtjen e Konkurrencës’, i ndryshuar dhe si rrjedhojë ky transaksion është objekt autorizimi nga Komisioni i Konkurrencës.

Referuar pasqyrave financiare palët në transaksion plotësojnë kriteret e xhiros së përcaktuar në nenin 12, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe si rrjedhojë ky transaksion është objekt autorizimi nga Komisioni i Konkurrencës.

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës” tregu përkatës do të konsiderohet tregu i eksplorimit, prodhimit dhe tregtimit të naftës bruto dhe tregtimit të produkteve të rafinuara dhe petrokimike, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur dhe tregu përkatës gjeografik do të konsiderohet territori i Republikës së Shqipërisë.

Transaksioni i propozuar është krijimi i një ndërmarrje të përbashkët Joint-Venture nga shoqëria Saudi Aramco Development Company dhe shoqëria Ge Oil & Gas Uk Limited (Baker Hughes).

Shoqëria J-V do të krijohet në Mbretërinë e Arabisë Saudite dhe nuk do të jetë aktive në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët me funksione të plota Joint-Venture nga shoqëritë Saudi Aramco Development Company (SADCO) dhe Ge Oil & Gas Uk Limited (Baker Hughes).
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS